



17. juni 2020

Inatsisartut Suleriaasianni § 37 imm. 1 naapertorlugu Naalackersuisunut apeqquutit imaattut matumuuna saqqummiuppakka:

Naalackersuisunut apeqquutit:

1. Meeqqat atuarfiat pillugu aaqqissuusseqqinissamut suliaq sumut killippa, aammalu qaqugu Naalackersuisut Inatsisartunut siunnersuummik saqqummiussissamaarpat?

2. Siunissami pisariaqartitat ullumikkut ersersinneqartartut eqqarsaatigissagaanni Meeqqat atuarfiat pillugu aaqqissuusseqqinissami sunarpiaq anguniangaava?

3. Meeqqat atuarfiat pitsanngorsaaviginiarlugu, tassuunakkullu meeqqat atuarfiannit ullumikkumit amerlanerusut soraarummeernermi naammassisalernissaannut ilinniaqqinnissamullu qulakkeerinnittunik isumassarsiat naleqquttut piviusullu sorliit sulinermi malinneqarnersut, Naalackersuisut maannangaaq oqaatigisinnaavaat?

4. Sulinermi suliniutit erninnaq ilumoortunngortinneqarsinnaasut aammalu ingerlaannaq sunnuteqarsinnaasut sopiaat Naalackersuisut ukkatarivaat?

5. Ilinniartitsisunik amingaateqarnermik ajornartorsiutit aaqiiviginiarlugit suliniutit sorliit ingerlanneqarpat?

6. Qanoq iliornikkut ilinniartitsisutut ilinniarnissaq pilerinarninngortinneqarniarpa?

7. Atuarfimmi pisortat ineriartortitsinermit perorsaanermullu aqutsinissamut piffissaqarnerulernissaat qanoq iliornikkut qulakkeerneqassava?

8. Annerpaamik agguaqatigiissillugu klassini atuartut 18-iusarnissaanut Naalackersuisut qanoq isumaqarpat, aammalu agguaqatigiissillugu klassini atuartunut killigititaasoq taanna aningaasatigut sulisutigullu qanoq kinguneqartitsissava?

9. Pissuserissaarnissamut, taassumallu malitsigisaannik meeqqat atugarissaarnerunissaat ilinniarnermilu angusarissaarnerunissaat anguniarlugu marlunnik ilinniartitsisoqartalernissamut aaqqissuussineq Naalackersuisut qanoq isumaqarfigaat?

- A: Marlunnik ilinniartitsisoqarnermi aappaa ilinniarsimangitsuusinnaanissaa Naalackersuisut qanoq isumaqarfigaat?

- B: Marlunnik ilinniartitsisoqartalernissamik aaqqissuussineq qanoq aningaasartuutitaqassava?

Akissummi aningaasatigut kingunerisassat naatsorsoqquneqarput ilinniartitsisut tamarmik ilinniarsimasuuppata aammalu ikiortitut ilinniartitsisoq ilinniarsimangitsuuppat.



10. Meeqqat atuarfiata aqqissusseqqinnissaanut piareersarnermi Naalakkersuisut soqutigisalinnik avataaneersunik qanoq annertutigisumik peqataatitsippat?

- A: Naalakkersuisut Demokraatit isumaqatigaat isummanik avataaneersunik soorlu ilinniartitsisut, angajoqqaat aammalu inuussutissarsiortut kattuffiinit peqataatitsinikkut aqqissusseqqinnissaq peqqissaartumik suliarilluagaasumillu iluatsilluarsinnaanerussasoq? Apeqqummut akissut aappiuppat soqutiginnittut sulinermi qanoq peqataatinneqarnersut Naalakkersuisunit nassuiaqquneqarpoq. Apeqqummut akissut naamiuppat isumaq taanna Naalakkersuisunit nassuiaqquneqarpoq.

11. Naalakkersuisut suliamut allanik soqutiginaatilinnik paasissutissaqarpat?

(Inatsisartunut ilaasortaq Nivi Olsen, Demokraatit)

Tungavilersuut

Naluneqanngitsutut atuartitaanermut ilinniartitaanermullu aqqissusseqqinnissamut sulineq massakkut ingerlavpoq. Tamanna aamma Siumut, Demokraatit aamma Nunatta Qitornaasa naalakkersuisooqatigiinnissamut isumaqatigiisutaanni suliasatut pingaartinneqartuni ilaavoq.

Demokraatinut pingaaruteqarluinnarpoq meeqqat atatuarfianut aqqissusseqqinnissap piviusorsiortuunissaa ilumoortunngortinneqarsinnaanissaalu. Innuttaasut, partiillu tamarmik meerartatsinnut meeqqat atuarfiat pitsaanerpaaq kissaatigaat. Massakkut taamaattoqanngilaq, kisitsisimmi takutippaat nunani allani sanilliuffigisartagatsinnit nunatsinni massakkut meeqqat pikkorissusaat annikinnerusoq.

Pikkorissutsip appasissusaa ajoraluartumik inuusuttut ilinniarfiinut ilinniaqqiffissanullu allanut ingerlaqqittarpoq. Taamaammallu meeqqat atuarfianni pikkorissutsikkut qaffaanissarput pingaaruteqarluinnarpoq.

Tassuunakkullu aamma eqqaamasariaqarparput annertuunik takorluugaqarsinnaatitaagatta, taamaattorli silatusaarnissamut pisussaataavugut. Allatut oqaatigalugu; iluaqutaanngilluinnarpoq pappialaannakkut nunarsuami atuarfiit pitsaanerpaat sinnattutsinnik tamakkiisumik imaqartumik pinngortitsigutta, sinnattugut aningaasatigut sulisoqarniarnikkullu atugassarititaasut ilumoortut peqqutigalugit ilumoortunngortinneqarsinnaanngippata. Tamatumuuna pitsaanerussaaq pappialaannarmi allaqqaannanngitsunik, piviusunilli ilumoortunngortinneqarsinnaasunillu pitsanngorsaatilik ilinniartunik, ilinniartitsisunik, angajoqaanit, atuarfinnilu aqutsisunit malugineqarsinnaasunik iluarsaassigutta.

Tamanna tungavigalugu suliaq sumut killinnersoq, sammisallu sorliit sammineqarnersut paasisaqarfigerusuppagut.

Apeqqutima ullut sulliviit naliginnaasut qulit iluanni akineqarnissaat kissaatigaara.